

Kontuola

ANTZUOLA / Egubakoitza / 2002ko otsailaren 14a / 146. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

Uzarragako errepedeari behin-behineko irtenbidea eman diote

AINTZANE IRIZAR

Badira bi aste Uzarragako bidea itxi zutela. Ohikoak diren lur mugimenduetatik apurtu egin zen errepedea; ordutik hona, hainbat bide alternatibo erabili behar izan dituzte auzotarrek. Hala, Diputazioak behin-behineko irtenbidea eman dio arazo horri.

Bi tokitan apurtu da Uzarragako bidea, Azkarate baserriaren parean: Azkaraterako bidegurutzeari baino beheaxeago, batetik, eta bidegurutze hori baino goraxeago, bestetik. Gipuzkoako Foru Aldundiko arduradunek egoera horri behin-behineko irtenbidea eman nahi izan diote. Hasiera baten, bidegurutzeari baino gorago zatia bakarrik konpontzeko asmoa zuten; goiko aldeko zatia konponduta, Lizarraga auzoko bidea hartu eta Azkarate baserriatik pasatuta Uzarragara iristea posible zelako.

Azkenean, baina, apurtuta zeuden gune guztiak konpondu dituzte Diputazioko langileek. Astelehen goizean hasi zituzten konponketa lanak, eta astea amaitzerako bidea konponduta egotea espero zuten. Sortutako ebakiak berdindu dituzte, baita errepedea asfaltatu ere.

BEHIN BETIKO IRTENBIDEA, ZAILAGOA
Esan bezala, baina, behin-behineko konponketa besterik ez da izan oraingo hori. Edozelan ere, Diputazioko arduradunen esanetan, errepede horri behin betiko irtenbidea ematea oso zaila da. Garestia, baina, batez ere, oso konplexua izango litzateke



Astelehen goizean hasi ziren errepedea konpontzen Diputazioko langileak.

netan, errepede horri behin betiko irtenbidea ematea oso zaila da. Garestia, baina, batez ere, oso konplexua izango litzateke

errepedea konpontzea. Izan ere, nahiz eta oraingoz konponduta geratu, lur mugimenduak etengabeak dira.

Bestalde, errepede apurketa gertatu den bihurgunera goitik datorren ura desbideratzeko asmoa dauka Diputazioak, horrek ere eragina duelako horrelako apurketetan.

Gainera, errepedearen trazaketa aldatzeko aukera aztertzen ere dihardute Diputazioko teknikariek. Hau da, Uzarragara iristeko errepedea beste nonbaitetik egin ote daitekeen aztertzen dihardute. Horrek, baina, lan handiagoa eskatzen du, eta luzerako jo dezake oraindik.

Astea bukatzerako errepedea konpontzeko lanak bukatuta izatea espero dute

Errepedearen trazaketa aldatzeko aukera aztertzen ari dira Diputazioko arduradunak

LABUR

Ipuin kontaketa, bihar, zapatua, liburutegian

Udal Liburutegiak umeendako ipuin kontaketa emanaldia antolatu du biharko, zapatua. Arratsaldeko seietan izango da emanaldi hori, Udal Liburutegian bertan, Eguzki auzoan. Ixabel Agirresarobe ipuin kontalariak *Pako fakirra* ipuina kontatuko du hantxe, umeen eta hain ume ez direnen gozamenarako.

Urtean hainbat ipuin kontaketa saio antolatzen ditu Udal Liburutegiak, umeen eta gaztetxoaren artean irakurzaletasuna eta literaturarekiko zaletasuna bultzatzeko helburuarekin.

Guraso Elkartearen eraikina botatzeko lanak, esleituta

Aurreko astean egindako osoko bilkuran, Guraso Elkartearena izandako eraikina eraisteko lanak esleitu zituen udalbatzak. Loiuako (Bizkaia) Danok Bat enpresari esleitu zizkieten eraisteko proiektuak idatzi eta eraikina botatzeko lanak.

Antzuolako Udalak lan horiek lehiaketara atera zituenetik, zazpi enpresa aurkeztu ziren. Antzuolako Udaleko arduradunen esanetan, datuaren hilean, martxoan, hain zuzen ere, maristena izandako eraikin hura botako dutela espero dute.

Antzuolaren gainean berbetan

Mireia Unamuno alkatea GOITBn

Goitb
Goiena Telebista

HERRILAN

- Eguaztena, otsailak 12, 20:30, 21:15, 22:30, 23:15
- Errepikapena eguenean, 14:00, 15:00
- Errepikapena asteburuan



Herriko gimnastak, Gipuzkoako Txapelketan

AINZANE IRIZAR

Antzuolako gimnasia erritmiko taldeko hiru neskek Gazteen Gipuzkoako Txapelketa jokatzen dihardute. Hilaren 1ean jokatu zuten lehendabiziko sailkapen saioa, Arrasaten; finalerako bigarren sailkapen saioa, berriz, martxoaren 22an jokatuko dute, Bergaran.

Hiru antzuolarrek dihardute Gipuzkoako Txapelketan: Maialen Toledok, Iraitz Gastiainek eta Uxue Arregik, hain zuzen ere.

Hilaren 1ean jokatu zuten lehenengo sailkapen saioa. Maialen Toledo lehenengo izan zen, Uxue Arregi hirugarren eta Iraitz Gastiain bederatzigarren.

Gimnastok azaldu zigitenez, Maialenek lan ona egin zuen Arrasaten, baina Uxuek eta Iraitzek nahiko zorte txarra izan zuten euren saioetan. Martxoaren 22an jokatuko dute hurrengo sailkapen saioa, Bergaran.



Zutik, Iraitz Gastiain; lurlean, berriz, Uxue Arregi eta Maialen Toledo.

ESKOLA ARTEKO TXAPELKETA

Bestalde, bihar, zapatua, Eskola Arteko Txapelketa jokatuko dute Bergarako Labegarrietako kirol-

degian. Txapelketa horretan Antzuolako hamabi neskek hartuko dute parte, alebin eta benjamin mailetan. Benjaminek

11:30ean jokatuko dute txapelketa; alebinek, berriz, arratsaldean, 16:30ean. Denetara, 200 bat gimnastak hartuko dute parte.

LABUR

Iñigo Ramírezek antzinako ohituren gaineko hitzaldia egingo du eguenean

Datorren astean, domekan, *Bizitza pasarteak Antzuolan* liburua aurkeztuko du Iñigo Ramírez de Okariz historiagileak. Antzuola Herria Ikerketa Bekaren laugarren emaitza izango da liburu hori. Aurkezpen horrekin lotuta, baina, bestelako ekitaldiak ere antolatuko dituzte. Besteak beste, datorren eguenean, hilaren 20an, antzinako ohituren gaineko hitzaldia egingo du Ramírezek Orlaran etxean, 19:00etan. Asteburu horretan eta hurrengoan, bestalde, base-rritarren jantzien gaineko erakusketa jarriko dute Orlaranen.

Herrigunea biziberritzeko planaren oinarriak onartu ditu udalbatzak

Aurreko asteko eguenean, otsailaren 6an, egin zuen udalbatzak osoko bilkura. Batzarrean, besteak beste, herrigunea biziberritzeko planak zein oinarri izan behar dituen erabaki zuten. Iñaki Berasategi arkitekto bergararrak egin zuen dokumentuaren aurre-berriak, eta hainbat proposamen egin zituen hantxe. Aurrerapen hori jendaurrean egon da; orain, behin oinarriak onartuta, herrigunea biziberritzeko plana bera idatzi beharko du Berasategik. Gero, jendaurrean jarriko dute berriro plan hori, behin betiko onartu aurretik.

Arrola mendi elkarteak bi irteera antolatu ditu datozen bi asteburuetarako

Etzi, domeka, Arlaban mendetik Urkulurainoko ibilaldia egingo dute Arrolakoek. Bidean, Elgeako haize-errotak, Degurixa eta Kurtzebarri ikusi ahal izango dituzte, besteak beste. 08:30ean irten-gera, plazatik. Hurrengo astebururako, berriz, iraupeneko eskia praktikatzeko irteera egitea zuten pentsatuta Arrolakoek, baina bertan behera laga dute. Horren ordez, egun baterako eski irteera antolatzeko asmoa dute, gertuagoko pistaren batera.



Kruz hiru urtean izan zen gerran

Orain dela bi asteko KONTUOLAn Espainiako gerran ibilitakoen gaineko artikulua argitaratu genuen, eta akats bat egin genuen; izan ere, Kruzek gerran ez zuela parterik hartu esan genuen, eta hori ez da horrela.

Hiru urte eman zituen gerran, Espainia osoan. Horren lekuko da argazkian ikusten den margolana, zein tokitan ibili zen zehazten duena. Kruzek hiru urte haietan hartutako apunteetan oinarrituta egin zion margolana haren anaiak, Serapiok./A.I.

KIROLA

PARTIDUAK

FUTBOLA

Otsailak 15
16:15: Antzuola-Urki (2. erregionala)

PILOTA

Otsailak 15 (Gipuzkoako Txapelk.)
17:00: Olalde-Murumendi (Infantilak)

EMAITZAK

FUTBOLA

Aretxabaleta 5 Antzuola 3 (Erreg.)
Antzuola 3 Behobia 3 (Gazteak)

PILOTA

Gipuzkoako Kluben Arteko Txap.
Hernani-Olalde (infantilak) 18-9
Udaberri saria
Olalde-Urnieta (nag. paletaz) . . . 35-12
Olalde-Batzokiko (nag. eskuz) . . . 22-6

SUKALDEKO ALTZARIAK
Harizki

MUEBLES IGEA

Sukalderako eta bainurako altzariak
Altzari rustikoetan
espezializatuak

Zurrategi plaza 4, behea. ANTZUOLA. Tel. eta faxa 943 78 71 80

zabalo
IGELTSEROTZA

Jose Luis Zabalo

Birgaitzeak • Fatxadak
Teilatuak • Sukalde eta bainu gelak

Kalegoi 9, 1. solairua, ANTZUOLA. Tel. 943 76 60 89